

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- जम्मू कश्मीर ते हरियाणा दिएं 90–90 विधानसभा सीटें लेई कल वोटें दी गिनतरी कीती जाग। जम्मू कश्मीर दे मुख् चुनां अधिकारी पी.के.पोले होरें आखेआ ऐ जे एहदे लेई लोड़चदे सब्बै प्रबंध करी लैते गेदे न।
- जम्मू कश्मीर दे साबका ते केई साबका मंत्रिएं सनें 873 मेदवारें दे सियासी भविक्ख दा कल फैसला होई जाग।
- प्रधानमंत्री नरेन्द्र मोदी होर अज्ज मालद्वीप दे राष्ट्रपति मोहम्मद मुइजू हुंदे नै गल्लबात करगंन। इस दरान दौनें मुख् बश्कार केई समझौतें पर दस्तखत होने दी बी मेद ऐ।
- गृहमंत्री अमित शाह होर सब्बै पक्खी अत्तवाद करी प्रभावत राज्यें दे मुख्मंत्रिएं कन्नै इक जायजा बैठक दी प्रधानता करगंन।

<><><><><><>

J&K-Counting

जम्मू कश्मीर दे असैंबली चुनाएं च अपनी किस्मत अजमा करदे 873 मेदवारें दे चुनां भागें दा फैसला कल हरियाणा वोटरें दी गिनतरी दे कन्नै 20 मतदान केन्द्रें च वोटें दी गिनतरी कन्नै होग। केन्द्र शासत प्रदेश च मतगणना लेई व्यापक इंतजाम कीते गेदे न। वोटें दी गिनतरी दे बाद जम्मू कश्मीर च नमीं सरकार बनाने दी बत्त पदरी होई जाग ते 2019 च दफा 370 ते 35–ए हटाए जाने दे बाद लोकें आस्सेआ चुनी गेदी सरकार बनोग। हाल च गै होए दे विधानसभा चुनाएं च जम्मू कश्मीर दे लोकें बधी–चढ़ियै हिस्सा लैता ते लोकतंत्र दे पर्व दा हिस्सा बने। तोआई जम्मू कश्मीर दे मुख् चुनां अधिकारी पी.के.पोले होरें गलाया ऐ जे वोटरें दी गिनतरी दा कम्म रमानदारी कन्नै तोड़ चाढ़ने लेई सब्बै इंतजाम करी लैते गेदे न।

<><><><><><>

Counting Prep.

औदी 8 अक्टूबर गी होने आली वोटें दी गिनतरी दिएं तैआरिएं गी दिक्खदे होई जम्मू खित्ते दे 10एं जिलें दे असेंबली हल्कें लेई वोटें दी गिनतरी आले अमले गी बिचचा-बिच्चा तालियै सरबंधत थाहरें पर भेजने आली दूई प्रक्रिया गी कल जम्मू, सांबा, कटुआ, रियासी, उघमपुर, राजौरी, पुंछ, रामबन, डोडा ते किश्तवाड़ दे सरबंधत जिला चुनां अफसरें दी निगरानी हेठ तोड़ चाढ़ेआ गेआ, जित्थें कुल 43 सीटें लेई वोटें दी गिनतरी कीती जानी ऐ। अमले गी बिच्चा-बिच्चा तालियै सरबंधत केन्द्रें पर भेजने दी इस प्रक्रिया गी भारती चुनां आयोग दे दिशा-निर्देशें मूजब तोड़ चाढ़ेआ गेआ। पारदर्शिता बनाई रखने लेई इस प्रक्रिया दी वीडियो रिकार्डिंग बी कीती गोई। जिला चुनां अधिकारिएं दस्सेआ जे अमले लोड़चदी सिखलाई देने लेई जरूरी बंदोबस्त करी लैते न।

<><><><><><><><>

Counting Institutions

जम्मू कश्मीर सरकार नै घोषणा कीती ऐ जे जम्मू दे 3 शैक्षणिक संस्थानें महिलाएं दा पद्मश्री पदमा सचदेव कालेज गांधी नगर, गौरमेंट एम.ए.एम.कालेज ते गौरमेंट पॉलिटैकनिक कालेज विक्रम चौक जम्मू 7,8,9 अक्टूबर गी बंद रोहगन, की जे इनें संस्थानें च हाल च सम्पन्न होए दे विधानसभा चुनाएं दी वोटें दी गिनतरी दा कम्म तोड़ चाढ़ेआ जाग।

<><><><><><><><>

Prominent Candidates

जम्मू कश्मीर दे साबका मुख्मन्त्री ते नैशनल कांफ्रेंस दे लीडर उमर अब्दुल्ला ते होर दुए सियासी पार्टिएं दे लीडरें दे भागें दा फैसला कल होग। उमर अब्दुल्ला होरें बडगाम ते गांधरबल चुनावी हल्कें थमां चुनां लड़ेआ ऐ। इंदे इलावा साबका उपमुख्मन्त्री मुज्जफर हुसैन बेग ते ताराचंद, साबका मंत्री रमण भल्ला, योगश साहनी, यशपाल कुंडल, शब्बीर अहमद खान, सुनील शर्मा, शक्ति राज परिहार, विकार रसूल, चौधरी लाल सिंह, हर्षदेव सिंह, सज्जाद गनी लोन, गुलाम अहमद मीर, बीजेपी दे सियासी प्रधान रविन्द्र रैणा, कांग्रेस प्रधान तारीक हमीद कर्रा, पीडीपी दी लीडर इल्तीजा मुफ्ती, अपनी पार्टी दे प्रधान अल्ताफ बुखारी ते सीपीआई(एम) दे मोहम्मद युसूफ तारीगामी हुंदे सियासी भागें दा फैसला बी कल होग।

<><><><><><><><>

DEO Counting

रियासी दे जिला चुनां अधिकारी विशेष महाजन होरें कल 8 अक्टूबर गी होने आली वोटें दी गिनतरी लेई बंदोबस्तें पर चर्चा लेई चुनां लड़ा करदे नमेदवारें ते सियासी पार्टिं दे नुमायंदे कन्नै कल इक बैठक लाई। महाजन होरें मेदवारें ते पार्टिं दे नमायंदे गी जकीन दोआया जे चुनां आयोग दे दिशा-निर्देशें मूजब एह पूरी प्रक्रिया बवस्थित ते पारदर्शी ढंगै नै तोड़ चाढ़ी जाग। जिला चुनां अधिकारी होरें उनेंगी गुजारश कीती जे ओह वोटें दी हगनतरी दरान अपना पूरा सैहयोग देन ते अनुशासन बी बनाई रखन। बैठक दरान एह जानकारी दित्ती गई ते मतगणना केन्द्रें दे अंदर बिजन उचित शिनाख्ती कार्डें दे नेई ओन दित्ता जाग। जिला चुनां अधिकारी होरें उनेंगी एह गुजारश बी कीती जे ओह तैह प्रक्रिया ते खास करियै आदर्श आचार संहिता दी पालमा जकीनी बनान।

<><><><><><>

Congress Confidence

वोटें दी गिनतरी आले ध्याड़े शा पैहले जम्मू कश्मीर प्रदेश कांग्रेस कमेटी दे प्रधान तारिक हमीद कर्रा होरें विश्वास जताया ऐ जे कांग्रेस ते नैशनल कांफ्रेंस दा गठबंधन सरकार बनाने लेई बहुमत दे आंकड़े गी अराम कन्नै पार करी लैग ते एग्जिट पोल च दस्से गेदे अंदाजे दे मकाबले च असल नतीजे मते बेहतर होंगन। कल जम्मू खित्ते च पार्टी दे मेदवारें कन्नै लाई गेदी इक बैठक दरान कर्रा होरें एह गल्ल आक्खी। तकरीबन साढ़े 3 घेंटे तोड़ी चली दी इक बैठक दरान प्रचार दी प्रक्रिया, प्रशासन दी भूमका ते पार्टी ते गठबंधन दे बक्ख-बक्ख पैह्लुएं पर तफसीली गल्लबात कीती गई। प्रदेश कांग्रेस दे प्रधान होरें इब्बी आखेआ जे बीजेपी गी हराने लेई ओह इक्कै जनेई विचारधारा आली पार्टिं ते मेदवारें कन्नै जुड़ने लेई तैआर न।

<><><><><><>

BJP Chug

भारतीय जनता पार्टी दे राष्ट्रीय महासचिव तरुण चुग होरें कल आखेआ ऐ जे उंदी पार्टी जम्मू कश्मीर ते हरियाणा च हाल च सम्पन्न होए दे विधानसभा चुनाएं च शानदार जित्त हासल करोग ते लोकें दे आर्शीवाद कन्नै सरकार बी बनाग।

एग्जिट पोल दी रिपोर्टें मगरा चुग होरें एह प्रतिक्रिया दित्ती। उनें गलाया जे जिस तरीके कन्नै प्रधानमंत्री होरें पिछले 10 बरें गिमां गरीब तबकें दे विकास लेई कम्म कीते न, उनें जम्मू कश्मीर दे लोकें दा भरोसा जित्तेआ ऐ। इस्सै लेई लोकें बीजेपी गी वोट दित्ते न ते चुनां दे नतीजे एह साबत करी देंगन।

<><><><><><><>

PM-Maldives

प्रधानमंत्री नरेन्द्र मोदी होर अज्ज मालदीव दे राष्ट्रपति डॉ. मोहम्मद मुइजू हुंदे कन्नै नमीं दिल्ली च दपक्खी, क्षेत्रीय ते अंतर्राष्ट्रीय मुद्दें उपपर गल्लबात करगंन। मीटिंग दरान दवै मुख्यें बश्कार केई समझौते उपपर दस्तखत होने दी बी मेद ऐ। मालदीव दे राष्ट्रपति होरें राजघाट जाइयै महात्मा गांधी होरें गी श्रद्धांजलि बी अर्पित करगंन। वार्ता शा पैहले डॉ. मुइजू हुंदा राष्ट्रपति भवन च रस्मी सुआगत कीता जाग। डॉ. मुइजू होर राष्ट्रपति द्रौपदी मुर्मू, उपराष्ट्रपति जगदीप धनखड़ हुंदे कन्नै बी मलाटी करगंन। मालदीव दे राष्ट्रपति होर भारत दी 5 रोजा यात्रा उपपर कल नमीं दिल्ली पुज्जे हे। एहदे शा पैहले इस बरे जून म्हीने च ओह नरेन्द्र मोदी हुंदे प्रधानमंत्री दे औहदे दी सगंध चुक्कने आले समारोह च शामिल होने लेई भारत आए हे। हिंद महासागर क्षेत्र च भारत दा मुख गोआंढी होने दे कन्नो कन्नी माददीव प्रधानमंत्री मोदी हुंदे मिशन सागर ते भारत दे अपने गोआंढ गी तरजीह देने आली नीति दे नजरियै च मुख थाहर रखदा ऐ।

<><><><><><><>

Amit Shah

केन्द्री गृहमंत्री अमित शाह होर अज्ज नमीं दिल्ली च सब्बै पक्खी अत्तबाद थमां प्रभावत राज्यें दे मुखमंत्रिण कन्नै बैठक दी अध्यक्षता करगंन। इस बैठक च आंध्रप्रदेश, बिहार, छत्तीसगढ़, झारखंड, तेलंगाना, ओडिशा, महाराष्ट्र ते मध्यप्रदेश दे मुखमंत्री हिस्सा लैंगन। एहदे इलावा प्रभावत राज्यें गी मदाद पजाने आले 5 केन्द्री मंत्री, राष्ट्रीय सुरक्षा सलाहका, केन्द्री सशस्त्र पुलस बल दे वरिष्ठ सलाहकार बी इस बैठक च शामिल होंगन। इक ब्यानै च गृहमंत्री होरें आखेआ ऐ जे केन्द्र सरकार मार्च 2026 तोड़ी सब्बै पक्खी अत्तवाद गी पूरी चाल्ली खत्म करने लेई वचनबद्ध ऐ।

<><><><><><><>

100 Day Jatinder

विज्ञान ते टेक्नोलाजी मैहकमे दे मंत्री डॉ. जितेन्द्र सिंह होरें आखेआ ऐ जे अंतरिक्ष सरबंधी स्टार्ट अप्स दे कौश लेई 1 ज्हार करोड़ रपे बक्ख रखे गेदे न। मोदी सरकार दे त्रीए कार्यकाल दे पैहले 100 दिनें दिएं खासियतें बारे बोलदे होई मंत्री होरें आखेआ जे पिछले 10एं ब'रें च मुखे च अंतरिक्ष सरबंधी स्टार्ट अप्स दी गिनतरी बधियै डेढ़ लक्ख दे पार पुज्जी गई ऐ ते दुनिया च त्रीए नंबरे पर ऐ। मंत्री होरें इब्बी दस्सेआ जे नरेन्द्र मोदी हुंदी सरकार आस्सेआ अंतरिक्ष दे खेत्तर च 100 फीसद सिद्धे विदेशी निवेश दे प्रावधान दी इजाजत कन्नै नमीं पैहलकदमिं ते नमें उद्यमिं गी मता बढ़ावा हासल होआ ऐ।

<><><><><><>

RBI

भारतीय रिजर्व बैंक दी मुद्रा नीति सरबंधी कमेटी दी त्रऊं दिनें दी बैठक अज्ज शुरू होग। माहिरें मूजब रिजर्व बैंक दिएं प्रमुख सूद दरें च कोई बदलाव नेई होने दी संभावना नेई ऐ। जिसलै दे खाने पीने आलिं चीजें दी मैहगाई ते आर्थिक विकास दर रिस्क रिजर्व बैंक लेई प्रमुख चिंता दे विषय न जिंदे बारे इस बैठक च सोच बचार कीता जाई सकदा ऐ। सरकार नै रिजर्व बैंक गी उपभोक्ता मुल्ल सूचकांक पर आधारित परचून मैहगाई गी 4 प्रतिशत कोला घट्ट बनाई सब्बने दा जिम्मा सौंपेआ ऐ। इस म्हीने दी शुरूआत च कमेटी दा नमें सिरेया गठन कीता गोआ हा ते एहदे च त्रै नमें मिंबर शामिल कीते गे हे। कमेटी दे अध्यक्ष ते आरबीआई दे गवर्नर शक्ति कांत दास होर बुधवारें बैठक दे खत्म होने दे बाद एहदे च लैते गेदे फैसलें दे बारे च जानकारी देंगन।

<><><><><><>